

Hotel Radisson Aruba na benta



ORANJESTAD - Carlson Rezidor Hotel Group, cu ta e doño di Radisson, a tuma decision pa pone e propiedad na Aruba na benta. Esaki minister di Turismo, Otmar a confirma ayera, despues cu e rumor aki ta coriendo pa basta luna caba.

Les e detayenan riba pagina A3

Ta haci esfuerso pa cadena keda Aruba

Minister a confirma: hotel Radisson Aruba ta na benta

ORANJESTAD - Carlson Rezidor Hotel Group, cu ta e doño di Radisson, a tuma decision pa pone e propiedad na Aruba na benta. Esaki minister Otmar Oduber di Turismo a declara ayera, despues di rumor coriendo basta luna caba.

E mandatario a bisa cu diabierna pasa e grupo a informa su persona. Tin e acusacion di opositor politico MEP cu minister a gaña cu e hotel ta na benta. "M'a nenga den pasado cu Radisson lo wordo bendi pasobra e momento ey e hotel no tabata na benta."

Awor si y e minister ta bisa cu e ta reuni cu ehecutivonan halto di Radisson pa e cadena keda na Aruba bou number di Blu.

Esaki ta un categoria mas halto cu e ta awor. Sr. Oduber a bula ayera pa New York unda lo combersa cu e representantenan di e cadena. Otro siman lo sigui cu e combersacionnan aki na Aruba. Pues e mandatario ta

spera cu por convence nan pa cana e caminda aki y no esun di bende. Pero un Radisson Blu lo rekeri un inversion si di e doño di mas o menos 30 pa 40 miyon dollar, segun sr. Oduber.

Legislacion

Locual e minister tambe ta desmenti ta cu e maneho di gobierno ta dirigi pa bin mas hotel di all-inclusive na Aruba. E mandatario ta haya cu si tin un padrino di all-inclusive, esaki ta MEP. "Ora nos ta critica RIU, ken a bin cu e hotel na Aruba?" Esaki a sosode na 2007 bou di gobernacion di MEP, e minister ta enfatisa.

Al contrario, gobierno ta pre-ocupa cu e expansion di all-inclusive pasobra ta wak cu cadena manera Hyatt tin un plan all-inclusive, Marriott ta creando nan nivel di all-inclusive y hasta Ritz Carlton ta den direccion di plannan 'all-inclusive'. E ta un fenomeno cu tur caminda y tambe den e region ta andando. Antes all-inclusive tabata pa e turista cu

no tin mucho placa, riba nivel mas abou. Pero cu e cadenan-an di hotel luhoso (3,4 strea) tambe ta scoge mas y mas pa all-inclusive, ta un desaroyo di e ultimo añanan. E ta un reaccion tambe riba e expansion di barco di crucero, cu ta birando mas grandi y luhoso tambe.

Minister Oduber ta bisa cu a haya bishita di diferente grupo di operador cu kier bay den e direccion di all-inclusive. A splica nan cu Aruba ta "demasiado chikito y demasiado dependiente di nos turismo pa nos por bay den un tendencia cu ta existi tur rond di nos", segun e mandatario. E 'tifon' aki gobierno no kier pa Aruba. "Nos mes-ter distingui nos mes for di e otro destinacionnan y competidonan.

Y awor nos ta trahando riba un legislacion cu ta conta hasta pa e permisonan existente. Mester un permiso pa opera como all-inclusive aki pa gobierno asina por midi e situacion, locual awor no ta existi."

Na benta

Pa loke ta e rumor cu esaki lo a wordo bendi cu RIU, minister Oduber ta bisa cu esaki no ta berdad. Loke a pasa ta cu Radisson Resort na Sint Maarten a wordo bendi cu RIU. "Lamentablemente e expansion di nan den Westin ta un transaccion priva y gobierno no por mete den dje". Si e cadena di all-inclusive di Sandals lo cumpra Radisson, e mandatario no por confirma.

"Nan por ta un di interesadonan pero mi no sa. Sandals a declara na maart cu nan ta mirando cierto islanan den Caribe pa por expande y Aruba ta un di nan. E cadena tambe a wordo menciona den compra di Occidental Hotel. E doño, un grupo Spaño a indica cu ta dispuesto pa laga e propiedad bay pa un bon prijs. No ta conoci con e situacion financiero di e hotel aki ta. Esun di Radisson si tabata malo. Segun minister Oduber e hotel ta bay haci 8 año di ta core den perdida, pues e situacion financiero di e hotel no ta esun miho. □